



Inatsisartunut ilaasortaq
Doris Jakobsen
Siumut

Danmarkimi ilageeqarnikkut suliaqarneq pillugu § 37 naapertorlugu apeqqummut nr. 2011-10-mut akissut

Inatsisartut suleriaasianni § 37, imm. 1 naapertorlugu 3. januar 2011-mi Naalakkersuisunit ima apeqquteqarputit:

Kalaallit Danmarkimi palasiata nunatsinnit aningaasaliiffigineqartarunnaarnissaa Naalakkersuisunit suli anguniagaanarluni? Taamaappat suut tunngavilersuutigalugit?

Akissut: Aallaqqaasiutigalugu nunaqqatitta piumassutsiminnik piumassuserinngisaminnillu Danmarkimiittut ilageeqarnikkut kiffartuunneqarnerannut soqtigininninnermut qujarusuppunga.

Naalakkersuisut siunertarinngisaannarpaat piumassuserinngisaminnik Danmarkimiittut ilagiinni suliaqarnikkut kiffartuunneqarnerisa unitsinneqarnissaat. Palasit suliassaasa erseqqissaatigineqarnissaat Naalakkersuisut kissaatigaat, tassami naalakkersuisoqarfiup suliassaqarfiinik nalinginnaasumik iluarsaanermi isumaqartoqarmat palasit atorfimmik allaaserineqarnerani allassimasut sinnerlugit suliassanik isumagisaqartartut.

Danmarkimi palasip kalaaliusup suliassai ilageeqarneq pillugu Inatsisartut inatsisaanni nr. 9-mi, 19. maj 2010-meersumi erseqqissarneqarput 2011-mullu aningaasanut inatsisikkut suliap taassuma nangingneqarnissaanut aningaasaliisoqarnissaa qularnaarneqarpoq.

Ilageeqarneq pillugu inatsimmi § 5, imm. 3-mi allassimavoq kalaallit namminneq piumassuserinngisaminnik Danmarkimi najugaqartariaqartut naalagiarinneqarnissamik tarnikkullu annikilliuutinik ikiorneqarnissamik neqeroorfigineqassasut. Naalakkersuisut taamaalillutik inatsisikkut palasip suliassai pingaarnerit erseqqissarpaat soorunalumi kalaallit piumassuserinngisaminnik Danmarkimiittut ilageeqarnikkut kiffartuunneqarnissaannik inatsimmi allassimasut malissallugit.

21. januar 2011
Sagsnr. 2011-044261
Dok. Nr. 548239

Postboks 1029
3900 Nuuk
Tlf: +299 34 50 00
Fax: +299 32 20 73
Email: kiin@nanoq.gl
www.nanoq.gl

Naalakkersuisut inatsisikkut pisussaaffigeriigaasa saniatigut kalaallit piumassuserinngisaminnik Danmarkimiittut pillugit Kultureqarnermut, Ilinniartitaanermut, Ilimatusarnermut Ilageeqarnermullu Naalakkersuisup danskit ilageeqarnermut ministeriat oqaloqatigilluarpaa. Tamanna danskit naalakkersuisui suleqatigalugit innuttaasut taakku palasimit kalaaliusumit kiffartuunneqarnissamik pisariaqartitsineri malinniarlugit pivoq. Suliap taassuma 2011-mi aasartinnagu inaarutaasumik paasisaqarfigineqarnissaa naatsorsuutigineqarpoq.

Inussiarnersumik inuulluaqqusillunga

Mimi Karlsen